

Saqqummiussaq nutaaq – Saqqummiussaq 13. November 2017-immeersumut taarsiullugu**Uunga siunnersuut: Kalaallit Nunaanni aalisarnermi pisarineqartut isumalluutinik atuinermut akitsuutaat pillugit Inatsisartut inatsisaat****Akissuteqaat**

(Aningaasaqarnermut Akileraartarnermullu Naalakkersuisoq)

Pingajussaaneerinninneq

Aningaasaqarnermut Akileraartarnermullu Ataatsimiitaliaq pingajussaaneerinninnissamut ilassutitut isumaliutissiissusiaanut Naalakkersuisut sinnerlugit qutsavigaara. Ilassutitut isumaliutissiissummi ataatsimiitaliami amerlanerussuteqartut inatsisissatut siunnersuutip aamma allannguutissatut siunnersuutit Naalakkersuisut saqqummiussaata akuersissutigineqarnissaa innersuussutigaat.

Inatsisip matuma aalajangiunneqarneratigut aalisarnermi akitsuusersueriaaseq tamarmiusoq tamanut tunngatillugu malittarisassatigut pisariillisaaffigineqarpoq siunissamilu isumalluutinut akitsuutit pillugit inatsit malillugu taamaallaat aqtsivigineqalissalluni. Tamanna aamma imatut paasineqassaaq, malittarisassat allat arlallit, tamatumunnga peqatigitillugu atorunnaarsinnejassasut. Uani pineqarput qaleralinnut aamma aalisagaqatigiaat allat ilaannut akitsuutit pillugit Inatsisartut inatsisaat, raajanut akitsuutit pillugit inatsisartut inatsisaat, kiisalu aalisarnermut atatillugu atuisunut akiliuteqartitsineq pillugu Namminersorlutik Oqartussat nalunaarutaat.

Naalakkersuisut inuussutissarsiortunik malitseqaataasumik oqaloqatiginninnissamik suliniuteqarnissaannik, ataatsimiitaliap ilassutitut isumaliutissiissummi kaammattuutigaa. Taamattaaq Naalakkersuisut inuttaasunut inuussutissarsiortunullu akitsuusersueriaatsimik nutaamik kalluarneqartussatut naatsorsuutigineqartunut Naalakkersuisut paasisitsiniaassasut ataatsimiitaliap kaammattuutigaa. Isumalluutinik atuinermut akitsuutip qanoq naatsorsorneqartarnissaannik, aammalu isumalluutinik atuinermi akitsuutit akileraartarnikkut qanoq suliarineqartarnissaannik ilitsorsorneqarnissamik pisariaqartitsineq, ataatsimiitaliap matumani immikkut eqqarsaatigaa.

Isumalluutinik atuinermut akitsuusersueriaatsip nutaap qanoq ililluni atuutsinnerani ilisimaarineqalernissaanut ataatsimiitaliap iluaqutaasumik kaammattuutai Naalakkersuisut tigujumavaat.

Paasisitsiniaanissamut pitsaasumut pisariaqartitsineq ilaatigut takuneqarsinnaavoq, inatsimmik matumannga sinerissamut qanittumi qaleralinniarnermut akitsuusersuinerup

annertusineqarnissaa pillugu tusagarsortoqarsimanera tunngavigalugu. Naalakkersuisut tamatumunnga tunngatillugu ilisimatitsissutigissavaat, sinerissap qanittuani qaleralinniarnermut akitsuusersuineq inatsimmi matumani annertusineqassanngimmat.

Aappassaaneerinninnermi ilimasaarutigineqartutut, Naalakkersuisut pingajussaaneerinninnissamut allannguutissatut siunnersummik saqqummiussipput. Allannguutissatut siunnersummi aalisagaqatigiaat ataasiakkaat ukioq kaajallallugu aalisarneqarnatik, ukiup ilaani piffissani ataasiakkaaginnarni aalisarneqartarnerat siunnersummi sillimmartaarfingeqarpoq.

Saniatigut 2018-imut aningaasanut inatsisisstatut siunnersuutip partiinut isumaqatiginniutigineqarnera tunngavigalugu Naalakkersuisut allannguutissatut siunnersummik saqqummiussipput. Allannguutissatut siunnersummi sinerissap qanittuani saarullinniarnerit, assagiarsunniarnerit nipi sanni arnerillu akitsuusersorneqassanngillat. Taamatullu paasineqarpoq, uiluinniarnermut siunnersummi akitsuusersueriaasissatut siunnersuutigineqartoq nammaneqarsinnaanngitsoq. Taamaattumik tamatumunnga aalisarnermut akitsuutissap aalajangersimasumik 5 procentiunissa siunnersuutigineqarpoq. Allannguutit taakku kingornatigut iluanaarutissat nikinnginnissaat qulakteerniarlugu, akitsuusersuinermut annerpaatut procentiusussaq 17-imit 17,5 procentinut qaffanneqarpoq.

Taama oqaaseqarlunga allannguutissatut siunnersuutit saqqummiunneqartut akuersissutigineqartussanngorlugit, kingornalu inatsisisstatut siunnersuut iluserilikamisut iluseqarluni akuersissutigineqassasoq Naalakkersuisut sinnerlugit siunnersuutigaara.